

**Aningaasarsianit akileraarutit pillugit Inatsisartut inatsisaata llanngortinneqarneranik
Inatsisartut inatsisaat nr. 29, 28. november 2016-imeersoq**

(Soraarnerussutisiaqarnissaq siunertaralugu ileqqaakkat, kinguaariinnut tullernut nikisitsinermit aningaasanut killiliussamik qaffaaneq)

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, Inatsisartut inatsisaatigut nr. 7, 6. 2016-imeersukkut kingullermik allanngortinneqartumi makku allannguutigittinneqarput:

1. § 39 a, imm. 1 ima oqaasertalerneqassaaq:

”§ 39 a. Aningaasarsiat akileraaruteqaataasussat naatsorsorneranni ilanngunneqassanngillat soraarnerussutisiaqarnissamut imaluunniit inuunermut sillimmasiinermit aaqqissuussinermit ingerlaavartumik, toqunikkut unittussamik tunniussiviusartumit tunniunneqartut, aaqqissuussinermit akiliutit ilanngaatigineqarsinnaanerit imaluunniit sulisitsisup akileeqataassutaasa ilanngunneqartussaanninnerat Danmarkimi, Savalimmiuni imaluunniit Kalaallit Nunaanni aningaasarsiat akileraaruteqaataasussat naatsorsorneranni tamakkiisumik ilaannakuusumilunniit atuutsinneqarsimanngitsoq, imaluunniit § 46, imm. 5 imaluunniit 6-i naapertorlugit akitsuut akilernerqarsimasooq soraarnerussutisiaqarsinnaatitaasup sillimmasiisullunniit uppernarsarsinnaappagu.”

2. § 39 b-ip *kingorna* ilanngunneqassaaq:

”§ 39 c. Aningaasarsianit akileraarutaasussat naatsorsorneranni ilanngunneqassanngillat naafferartumik akilersuilluni sillimmasertinnermit pisartakkat, soraarnerussutisiaqarnissaq siunertaralugu soraarnerussutisiaqarnissamut ingerlatseqatigiiffimmi pilersinneqarsimasumut, Kalaallit Nunaanni angerlarsimaffeqarani sillimmasiisarfiit pillugit inatsimmi ilaasuni soraarnerussutisiaqarnissamut ingerlatseqatigiiffimmit Kalaallit Nunaanni angerlarsimaffilimmit, soraarnerussutisiaqarnissamut ingerlatseqatigiiffimmut, Kalaallit Nunaanni angerlarsimaffeqarani, sillimmasiisarfiit pillugit inatsimmi ilaasumi aamma Finanstilsyn-imit akuerineqarsimasumut soraarnerussutisiaqarnermut aaqqiissutip imai tunniunneqarnerani, soraarnerussutisiaqarsinnaasup sillimmasiisullunniit uppernarsarsinnaappagu, naafferartumik sillimaserinneq pilersinneqarsimasooq. Tamanna taamaallaat atuuppoq naafferartumik akilersuilluni soraarnerussutisiaqarnissamut toqqorsivimmit pisartakkanut, soraarnerussutisiaqarnissamut aaqqissuussinermit imarisat nuunneqarnerannut atatillugu nuunneqarsimasunut, matuma ataani toqqorsivimmit tamatuminnga iluanaarutinit pisartakkat. Soraarnerussutisiaqarnissamut aaqqissuussinermit imarisat nuunneqarnerannut atatillugu toqqorsiviup nuunneqareernerata kingunerisaanik naafferartumik akilersuilluni soraarnerussutisiaqarnissamut toqqorsivimmut akiliuteqartoqarpat, aningaasarsiat akileraarutaasussat naatsorsorneranni ilanngunneqassanngillat, soraarnerussutisiaqarsinnaatitaasup sillimmasiisullunniit uppernarsarsinnaappagu pisartakkat akitsuuserneqarsimasut § 46, imm. 5 naapertorlugi. Aningaasarsianit akileraaru-

taasussat naatsorsorneqarneranni naafferartumik akilersuilluni sillimmasertinnermit pisartakat ilanngunneqassanngillat § 39 b aamma § 67 a-lu naapertorlugit.”

3. § 44, imm. 1-imi, nr. 5-itut nutaatut ilanngunneqassaaq:

”5) naafferartumik akilersuilluni soraarnerussutisiaqarnissamut toqqorsivimmit, soraarnerussutisiaqarnissamut ingerlatseqatigiiffimmit Kalaallit Nunaanni angerlarsimaffilimmit, soraarnerussutisiaqarnissamut ingerlatseqatigiiffimmut Kalaallit Nunaanni angerlarsimaffeqarani, sillimmasiisarfiit pillugit inatsimmi ilaasumut, Finanstilsynet-mit akuerineqartumik, sillimmatit imaannik nuussinermi iluanaarutit, naafferartumik akilersuilluni soraarnerussutisiaqarnissamut nuussereernermi akiliinernit, naafferartumik akilersuilluni soraarnerussutisiaqarnissamut toqqorsivimmi imarisat amerlisimanerannit iluanaarutit imm. 1-imi atuupput.”

4. § 46-mi, imm. 4-p kingorna, immikkoortutut nutaatut ilanngunneqassapput:

”Imm. 5. Soraarnerussutisiaqarnissamut ingerlatseqatigiiffimmi Kalaallit Nunaanni angerlarsimaffeqartumit, soraarnerussutisiaqarnissamut Kalaallit Nunaanni angerlarsimaffeqarani, sillimmasiisarfiit pillugit inatsimmi ilaasumut Finanstilsynimillu akuerisaasumut soraarnerussutisiaqarnermut aqqiissuussap imaannik nuussinermi imm. 1 aamma 2 atuutinngillat. Soraarnerussutisiaqarnissamut aqqiissutit imaannik nuussinermi taamaattumi, soraarnerussutisiaqarnissamut aqqiissutinut tamanut, ukiumi tassani soraarnerussutisiaqarnissamut aqqiissuussinerup imaannik nuussiffimmi, inuup, soraarnerussutisiaqarnissamut aqqiissummik piginnittup, procentit akileraarusiissutissaasa tamarmiusut annertoqqataanik akitsuusiisoqassaaq. Inummut ataatsimut procentit akileraarusiissutissat tamarmiusut tassaasarpud kommunimut akileraarutit, nunamut tamarmut akileraarutit, nunamut tamarmut immikkut akileraarutit aamma kommuninut ataatsimut akileraarutit katinneri.

Imm. 6. Imm. 1 aamma 2 atussanngilaq, soraarnerussutisiaqarnissaq siunertaralugu ileqqaakanit soraarnerussutisiaqarnissamut aningaasaateqarfinnut, Kalaallit Nunaanni angerlarsimaffeqaratik, sillimmasiisarfiit pillugit inatsimmi ilaasuni imaluunniit inuunermut aamma soraarnerussutisiaqarnissamut sillimmasiisarfinni, Kalaallit Nunaanni angerlarsimaffeqaratik, sillimmasiisarfirmik ingerlatsinissamut Finanstilsynimit akuersissuteqartunut, nuussinermi, nuussineq aalajangiinerup § 47 f, imm. 2, nr.1-imut ilaasup kingunerippagu. Nuussinermi taamaattumi, ukiumi tassani nuussiffimmi, soraarnerussutisiaqarnissaq siunertaralugu ileqqaakanik piginnittup, procentit akileraarusiissutissaasa tamarmiusut annertoqqataanik akitsuusiisoqassaaq. Inummut ataatsimut procentit akileraarusiissutissat tamarmiusut tassaasarpud kommunimut akileraarutit, nunamut tamarmut akileraarutit, nunamut tamarmut immikkut akileraarutit aamma kommuninut ataatsimut akileraarutit katinneri.”

5. § 47, imm. 1-mi oqaaseqatigiit aappaattut nutaatut ilanngunneqassaaq:

”Nuussinermi § 46, imm. 5-imi taaneqartutut, akitsuut akileraartarnermut ingerlatsivimmut nalunaarutigineqassaaq akilerneqassallunilu, nuussinerup kingorna kingusinnerpaamik qaamatit sisamat qaangiuppata ulluinnarmi kingullermi.”

6. § 47-p kingornagut qulequttatut nutaatut ilanngunneqarpoq:

”Kapitali 4 a

Soraarnerussutisiaqarnissaq siunertaralugu ileqqaakkat”.

7. Qulequttap nutaap kingornagut ilanngunneqarput:

”§ 47 a. Kapitali una soraarnerussutisiaqarnissaq siunertaralugu ileqqaakkanut, aningaaserivinni Kalaallit Nunaanni angerlarsimaffeqartuni imaluunniit aalajangersimasumik ingerlatsiveqartuni, Finanstilsynimillu akuersissummik peqarlutik nunami maani aningaaseriveqarnermik ingerlatsisuni pilersinneqarsimasunut atuuppoq.

§ 47 b. Soraarnerussutisiaqarnissaq siunertaralugu ileqqaakkanut akiliutit soraarnerussutisiaqarnissaq siunertaralugu aningaaserivimmi pineqartumi uninngasuutit kontuinut immikkut it-tunut ikineqassapput.

Imm. 2. Kontomut aalajangersakkatut ilaassaaq, aningaasaatit ingerlaavartumik erniallit il.il. kontomik piginnittumut tunniunneqassasut. Aammalu piginnittup toqunerani tunniussinissaq pillugu aalajangersaasoqassaaq. Ileqqaarnissamut aaqqissuussamik pilersitsinermi imaluunniit kingorna, piginnittup kingornussisussani imaluunniit § 39, imm. 1, nr. 4 aamma 6-imi taaneqartut, aapparisaq, najugaqatigisaq imaluunniit meeqqat qimagaasut tiguisussatut ilanngussinnaavai. Piginnittup kingornussisussai tiguisussatut ilanngunneqarsimappata, tamarmik ileqqaakkanik tigusaqassapput, testamentimi imaluunniit inatsimmi allassimasut malillugit piginnittumit kingornussisussaataaneq naapertorlugu. Piginnittup ”qaniginerpaasat” tiguisussatut ilanngussimappagit, ilanngussatut isigineqassaa pineqartup aapparisaq imaluunniit, taamaattumik qimagaasoqanngippat, pineqartup meerai imaluunniit, taamaattumik qimagaasoqanngippat, pineqartup kingornussisussai. Piginnittup ilanngussineq utertissinnaavaa, utertissinnaannginnermik tiguisussamut isumaqatigiissuteqarsimanngikkuni. Tiguisussamik ilanngussineq taassuminngalu tunuartitsineq taamaallaat atuutissaaq, aningaaserivimmut allakkatigut nalunaarutigineqarpat imaluunniit aningaaserivimmit soraarnerussutisiaqarnissamut aaqqissuussinermit isumaqatigiissummi ilanngunneqarpat imaluunniit uppersarlugu atsiorneqarpat.

Imm. 3. Aamma piginnittoq, Siusinaartumik pensionisiat pillugit Inatsisartut inatsisaanni maleruagassat naapertorlugit siusinaartumik pensionisiaqarlersinneqassagaluarpat imaluunniit piginnittoq nappaammit inuunermut navianartorsiortitsisumik eqqorneqassagaluarpat piginnittumut tunniussinissaq aalajangerneqarsinnaavoq.

Imm. 4. Kontomut ilanngunneqarsinnaapput aapparisaq imaluunniit inooqatigisap soraarnerussutisiaqarnissaanut sillimat, meerarisap soraarnerussutisiaqarnissaanut sillimmat, innarluuteqalernermi soraarnerussutisiaqarnissamut sillimmat ataavartoq § 39, imm. 1-imi taaneqartutut aamma perululluni napparsimanerit ilaat pillugit sillimmat.

Imm. 5. Akiliutit imm. 1-imi taaneqartut aningaasarsiat akileraaruteqaataasussat naatsorsorneranni ilanngaateqarsinnaapput. Ilanngaateqarsinnaataaneq uninngasuutinut kontumik pineqartumik piginnittumut atuuppoq, kina akiliuteqarsimansoq apeqquaatinnagu, taamaal-

laallu atuulluni piginnittoq nunami maani tamakkiisumik akileraartussaataatillugu akilernerqarsimasunut.

Imm. 6. Sulisuusup aningaasarsiaasa akileraaruteqaataasussat naatsorsorneranni ilanngunneqassanngillat aningaasat, sulisitsisup ileqqaakkanut imm. 1-imi taaneqartunut akiligai. Sulisitsisup akileeqataassutaasa ilanngunneqartussaanninnerat sulisuusup nunami maani tamakkiisumik akileraartussaataanerani akilernerqarsimasunut taamaallaat atuuppoq.

Imm. 7. Soraarnerussutisiaqarnissaq siunertaralugu ileqqaakkat iluanaarutitaat piginnittup aningaasarsiaasa akileraaruteqaataasussat naatsorsorneranni ilanngunneqassanngillat. Selskab-it peqatigiiffiillu Kalaallit Nunaanni angerlarsimaffeqartut iluanaarutisianik pisassanngortitsisut, tak. § 86, imm. 1 og 2, iluanaarutisianit akileraarutinik unerartitsissanngillat iluanaarutisiat soraarnerussutisiaqarnissaq siunertaralugu ileqqaakkanut tunniunneqarpata.

§ 47 c. Soraarnerussutisiaqarnissaq siunertaralugu ileqqaakkani aningaasat nioqqutissanut aningaasaliissutaasinnaapput taamaallaat, aningaasaliissutit tamarmiusut annaanissaanut aarlerinaat annikitsuaraarsuurtut isigineqarpata, kiisalu nioqqutissaq paasiuminaatsuunngippat (aarlerinaat qorsuk) imaluunniit nioqqutissanut, aningaasaliissutit tamarmik ilaannakulluunniit annaanissaanut aarlerinaatilimmut, kiisalu nioqqutissat paasiuminaatsuunngippat (aarlerinassuseq sungaartoq). Ileqqaakkani tamarmiusuni aarlerinaammut qorsuusumut 100 procent-imik aningaasaliisoqarsinnaavoq. Ileqqaakkani tamarmiusuni aarlerinaammut sungaartuusumut annertunerpaamik aningaasaliisoqarsinnaavoq:

- a) Inunnut 35 ataallugit ukiulinnut 100 pct.
- b) Inunnut 35-44-llu akornanni ukiulinnut 90 pct.
- c) Inunnut 45-49-llu akornanni ukiulinnut 80 pct.
- d) Inunnut 50-59-illu akornanni ukiulinnut 70 pct.
- e) Inunnut 60-64-illu akornanni ukiulinnut 50 pct.
- f) Inunnut 65-69-illu akornanni ukiulinnut 30 pct.
- g) Inunnut 69-it sinnerlugit ukiulinnut 10 pct.

Imm. 2. Aktiat imaluunniit aningaasaliiffissat akuleriiaat qaammatip naanerani amerlassusii- sa amerlanerpaaffissaq imm. 1-imi taaneqartoq qaangersimappassuk oqimaaqatigiissaareqqit- toqassaaq, taamaattoarli tak imm. 3.

Imm. 3. Soraarnerussutisiaqarnissaq siunertaralugu ileqqaakkanut, inummit ulloq 31. december suli 63-inik ukioqalersimanngitsumit pigineqartunut ukiuni aningaasarsiorfinni kingullerni pingasuni akiliisoqarsimappat oqimaaqatigiissaareqqinneq pisinnaavoq, aktiat imaluunniit aningaasaliiffissat akuleriiaat pigineqatut annerpaaffissamit imm. 1-imi taaneqartumit minnerulernissaat tikillugu aktianik imaluunniit aningaasaliiffissanik akuleriiaanik pisinnginnikkut.

§ 47 d. Aningaasat soraarnerussutisiaqarnissaq siunertaralugu ileqqaakkaniittut pigisamik aalaakkaasumik imaluunniit aktianik il.il., niuerfinni aqqissuussaasuni imaluunniit niuerfittut aqqissuussaasuni niuerutissatut ilanngunneqarsimanngitsunik, imaluunniit aktianik il.il., uninngasuutinut kontumik piginnittup atuisinnaanermik piginnaatitaaffinnik, akikillisaatinik assigisaannilluunniit, imaluunniit suliffeqarfimmi namminersorluni inuussutissarsiummi pi-

ginneqataassutinik tunineqarnissaanik siunertaqartunik, siunertamilluunniit ilaatut taama siunertaqartunik pisinermut atorneqarsinnaanngillat.

Imm. 2. Pappiaqqat aningaasanik nalillit, pappiaqqanik aningaasanik nalilinnik atuutilersitsisartumit ataatsimit atuutilersinneqartut piffissami pisiarineqarfimminni nalingat soraarnerussutisiaqarnissaq siunertaralugu ileqqaakkat tamarmiusut 20 procentiannit anginerusinnaanngilaq. Kisianni pappiaqqanut aningaasanik nalilinnut, pappiaqqanik aningaasanik nalilinnik atuutilersitsisartumit ataatsimit atuutilersinneqartunut 50.000 kr.-it tamatigut atorneqarsinnaapput. Aningaasat taaneqartut kisitsisit akinut naleqqersuutit, kisitsisit akinut naleqqersuutit 1. julimeersut qaammatit 12-it kingullit ingerlaneranni allannguutaattut naatsorsukkat tunngavigalugit Naatsorsueqqissaartarfimmit naatsorsorneqarsimasut malillugit iluarsineqassapput. Iluarsineq ukiumoortumik pisassaaq, ukiumi tulliuuttumi 1. januar atuuttussanngorlugu. Aningaasat iluarsisat Naalakkersuisut ukiut tamaasa kingusinnerpaamik 1. januar tamanut nalunaarutigisassavaat.

Imm. 3. Aningaasat soraarnerussutisiaqarnissaq siunertaralugu ileqqaakkaniittut selskabini aktianik il.il., piginnittup piginnittullu ilaqaata selskabimi aktiat il.il. 25 procentiinik amerlanerusunilluunniit piginnittuuffigisaanni pisinermut atorneqarsinnaanngillat. Pigineqataassutit naatsorsorneranni aammattaaq ilanngunneqassapput aktiat il.il., piginnittup soraarnerussutisiaqarnissamik aqqissuussinerup saniatigut pigisai kiisalu aktiat il.il., pineqartup aapparisaanit, angajoqqaavinit, aataakkuinit/aanakkuinit, qitornaanit, erngutaanit tamakkulu aapparisaannit pigineqartut. Qitornassat qitornavissiartaarisimasallu ilaqutavittut isigineqassapput.

§ 47 e. Soraarnerussutisiaqarnissaq siunertaralugu ileqqaakkanik piginnittup aktiat pigisaluunniit allat, aningaasat soraarnerussutisiaqarnissaq siunertaralugu ileqqaakkaneersut atorlugit pisiarineqarsimasut tigugunigit, piginnittup pigisap tiguneqartup nalinga aningaaserivimmut nalunaarutigissavaa, nalingalu soraarnerussutisiaqarnissaq siunertaralugu uninngasuutit kontuannut akilissallugu. Aktiat tiguneqartut il.il. nalingisa akiliinerit qaangerpagit, assigiinngissut § 46, imm. 1-imi aalajangersagaq malillugu akileraaruserneqassaaq.

Imm. 2. Soraarnerussutisiaqarnissaq siunertaralugu ileqqaakkanik, aningaaseriviit § 47 a-mi taaneqartut akornanni, imaluunniit aningaaseriviit § 47 a-mi taaneqartut aamma soraarnerussutisiaqarnissamut aningaasaateqarfiit aammalu inuunermut soraarnerussutisiaqarnissamullu sillimmasiisarfiit Kalaallit Nunaanni angerlarsimaffeqartut akornanni nuussineq tunniussineritut akiliinertullu isigineqassanngilaq.

§ 47 f. Soraarnerussutisiaqarnissaq siunertaralugu ileqqaakkanit piginnittumut tunniussisarnerit siusinnerpaamik aallartissinnaapput ulloq piginnittup 60-inik ukioqalerfia aallarnerfigalugu, ukiukinnerunissaq akileraaruseriffimmit akuerineqarsimanngippat. Tunniussisarnerit kingusinnerpaamik aallartissapput ullormi piginnittup soraarinngornissamut ukiuni anguppagit, tak. Utoqqalinersiaqarneq pillugu Inatsisartut inatsisaat § 1.

Imm. 2. Soraarnerussutisiaqarnissaq siunertaralugu ileqqaakkanit tunniussinissaq siulleq pitinnagu, piginnittup tunniunneqartartussat qanoq agguataagaanissaat aalajangissavaa. Piumasaqaatit makku eqquutsinneqassapput:

1) Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aqqissuussinerisa ikinnerpaamik 50 %-ii inuuneq naallugu, toqussaq tikillugu ingerlaavartumik tunniunneqartartussatut tunniunneqasapput.

2) Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aqqissuussinerisa amerlanerpaamik 50 %-ii sivikinnerpaamik ukiuni qulini amerlaqatigiiaarlugit tunniunneqartartussatut naafferartumik tunniunneqartarsinnaapput.

Imm. 3. Imm. 2 naapertorlugu naatsorsuinermi, soraarnerussutisiaqarnissaq siunertaralugu ileqqaakkanit tunniussinissaq siulleq qaammatinik amerlanerpaamik marlunnik sioqqullugu nalingat tunngavigineqassaaq. Naatsorsuinermi ilaassapput soraarnerussutisiaqarnissaq siunertaralugu ileqqaakkat aamma soraarnerussutisiaqarnissamut inuunermullu sillimmasiinermik aqqissuussinerit tunniussiviusartut soraarnerussutisiaqarnissarlunniit siunertaralugu ileqqaakkanit tunniussinerup siulliup kingorna ukiut pingasut qaangiutinnginneranni tunniussiffiusalersinnaasut.

Imm. 4. Piginnittup soraarnerussutisiaqarnissaq siunertaralugu ileqqaagaasa aamma soraarnerussutisiaqarnissamut inuunermullu sillimmasiinermik aqqissuussinerisa nalingat tamarmi-
usoq, tak. imm. 2 aamma 3, 700.000 kr.-init minneruppat, piginnittup soraarnerussutisiaqarnissaq siunertaralugu ileqqaakkat ilaat 100.000 kr.-it tikillugit ataasiartumik tigusinnaavai. Aningaasat sinneriunnagaat qaammammut 4.500 kr.-ikkaarlugit tunniunneqartassapput.

Imm. 5. Soraarnerussutisiaqarnissaq siunertaralugu ileqqaartup toqunerani, § 47 b, imm. 2 naapertorlugu aningaasat tunniussivigineqartussamut imaluunniit tunniussivigineqartussanut tussapput. Ileqqaartoq toqussagaluaruni pissat pillugit aalajangiisimangikkuni, imaluunniit tunniussivigineqartussaq imaluunniit tunniussivigineqartussat toqukkut qimagussimappata, soraarnerussutisiaqarnissaq siunertaralugu ileqqaakkat piginnittup qimataanut tussapput. Tunniussivigineqartussamut ilanngussisimaneq, aningaasat ileqqaakkat amerlassusaat kiisalu aningaasat tunniunneqarsimanersut pillugit aningaaseriviup, piginnittup toqusimaneq pillugu kingusinnerpaamik tunniussivigineqartussap nalunaarfiginerani eqqartuussivik toqusup qimataanik suliarinnittoq, nalunaarfigissavaa. Tamatuma kingorna piginnittup apparisaa inuunermilu kingornussisussai eqqartuussiviup nalunaarfigissavai.

§ 47 g. Aningaaseriviit soraarnerussutisiaqarnissaq siunertaralugu ileqqaakkanik piginnittunut ataasiakkaanut tunngatillugu ileqqaakkanut akiliutigineqartut ileqqaakkanillu tunniunneqartut tamarmiusut, ukiut tamaasa januarip qaammataa naatinnagu nalunaarutigisassavaat.

Imm. 2. Kikkulluunniit soraarnerussutisiaqarnissaq siunertaralugu ileqqaakkanit tunniussisut imaluunniit § 47 b, imm. 3-mi 4-milu aamma § 47 f, imm. 2-mi, 4-mi 5-imiluunniit taaneqartunik tunniussisut unerartitsisussaataasutut isigineqarput, tak. § 76, imm. 1 aamma 2, tamanalu malillugu akileraarutinik A-nik, maleruagassat unerartitsisussaataasunut atuuttut naapertorlugit unerartitsissapput, akiliissallutik nalunaarutiginnissallutillu.

§ 47 h. Aningaasarsianit akileraartussaataavaq piginnittoq, imaluunniit piginnittup toquneratigit tunniunneqartussanik pisinnaatitaasoq, tak. § 47 b, imm. 2.

Imm. 2. Piginnittup imaluunniit tunniussivigineqartussap soraarnerussutisiaqarnissaq siunertaralugu ileqqaakkanut pisinnaatitaaffii akiligassa qarfiannit eqqartuussisutigoortumik su-liassanngortitsinermut atorneqarsinnaanngillat, kisianni tak. imm. 3 aamma 4.

Imm. 3. Piginnittoq akiliisinnaajunnaarpat, paasineqarpallu, ukiut pingasut kingulliit akiliiffissaq kingulleq sioqqullugu, piffissami akiliiffimmi aningaasaatimigut inissisimanerminut sannilliullugu, aningaasanik amerlavallaartunik akiliisimappat, akiliisinnaajunnaarnermit piumasarineqarsinnaavoq, piginnittup akiliutigivallaagai aningaaseriviup utertissagai, ileqqaakkat nalingisa sapinngisamik akilersinnaasaanik. Akiliisussaannermut killiliussaasoq sioqqullugu ileqqaakkanik tiguisinnaanermt piffissarititaasoq atuutilersimappat imaluunniit akiliisinnaajunnaarnerup naammassineqannginnerani, soraarnerussutisiaqarnissaq siunertaralugu ileqqaakkat tiguisinnaanermt piffissarititaasoq atuutilersimappat, aningaasallu tiguneqarsimanngippata, akiliisinnaajunnaarnerup imm. 1-imi malittarisassat taaneqartut malillugit ileqqaakkat ilaasa amerlaqataannit akiliisinnaajunnaarnermi pigisanut akiliisoqassasoq piumasaqarsinnaapput.

Imm. 4. Imm. 3 atuuppoq, tunniussivigisassamik ikkussisoqarsimagaluarpalluunniit, aamma piginnittoq tunniussinissamik utertitsinnaananani pisussanngornikuugaluarpalluunniit. Tunniussivigineqartussaq ikkunneqarnermini akiliisimappat, pineqartoq piginnaatitaavoq akiliutimi akiliisinnaajunnaarnermi pigisanit utertinneqarnissaanut piumasaqassalluni. Tunniussivigineqartussap ileqqaakkat pisimappagit, akiliisinnaajunnaarnermi pigisanit piumasagaat tassunga atuussinnaavoq.

§ 47 i. § 39, imm. 2, § 40 a, imm. 1, § 41, imm. 1 aamma 3, § 46, imm. 1-imiit 3-mut, aamma § 47 soraarnerussutisiaqarnissaq siunertaralugu ileqqaakkanut taamatuttaaq atuutissaput.”

8. § 57, imm. 3-mi allaqqasoq ”100.000 koruuninit” allanngortinneqarpoq ima: ”350.000 koruuninit”.

9. § 57, imm. 3-mi oqaaseqatigii aappaattut nutaatut ilanngunneqarput:

”Imm. 1 naapertorlugu akuersissut ukiunit qulinit sivilunerusumik atuussinnaanngilaq, aningaasallu akuerineqartut katillutik 3.500.000 kr.-init amerlanerusinnaanatik.”

§ 2

Inatsisartut inatsisaat 1. januar 2017-imi atortuulissaaq, taamaattorli tak. imm. 2.

Imm. 2. § 47 c, imm. 2 aamma 3 atortuulissapput 1. januar 2020-mi.

Imm. 3. Maannakkorpiaq aningaasarsiat Inissiani attartortittakkani ineqarnermt tapiissutit pillugit Inatsisartut inatsisaat, Utoqqalinersiaqarneq pillugu Inatsisartut inatsisaat aamma Siusinaartumik pensionisiat pillugit Inatsisartut inatsisaat naapertorlugit naatsorsorneranni ilanngunneqassanngillat soraarnerussutisiaqarnissamut inuunermulluunniit sillimmasiinermt aaqquissuussinernut, inuuneq naallugu ingerlaavartumik tunniussiviusartussanut akileraaruteqarnani akiliutit, pensionisiaqarsinnaatitaasup imaluunniit sillimmasiisup

aaqqissuussinermut akiliutit aningaasarsiat akileraaruteqaataasussat naatsorsorneranni ilanngaatisinnaanngippagit imaluunniit sulisitsisup akileeqaataassutai ilannguttussaappagit, tak. § 39 a, imm. 1 aamma 2.

Namminersorlutik Oqartussat, ulloq 28. november 2016



Kim Kielsen